





~~H-5-D-23~~

**LO MALATO
P' APPRENZIONE
DE MONZÙ MOLIERO**

PORTATO ADDAVERO

A LO SPETALE DE LI PELLERINE.

PECCHÈ STROPPIATO

DA LO BARONE MICHELE ZEZZA.



NAPOLE

DA LI TRUOCCHIE DE LA SOCIATA' FREMMATECA.

1855.

St. P. 1

*Prendo la cetra gallica ,
L' accordo al patrio suono ;
E se Molier non sono ,
Vo l' orme sue seguir.*



PERZONAGGE.

D. PEPPE , malato p' apprenzione.
D. POPA , seconna mogliera de D. Peppe.
NICOLETTA , figlia de D. Peppe.
RITA , peccerella , figlia de D. Peppe.
D. NUFRIO , frate de D. Peppe.
D. CAMILLUCCIO , nnammorato de Nicoletta,
D. DIAFORIO seniore , miedeco.
D. DIAFORIO iuniore , figlio suo.
D. ARAZIO , miedeco.
D. MATTEO , servezialista.
D. MALARIO , notaro.
ROSELLA , vaiassa ncasa de D. Peppe.

PERZONAGGE A LA SCOMPETURA.

Presidente de li miedece. Miedece. Geruggeche. Spezeiale. Servezialiste. D. Peppe , baccelliero.

*La scena se rappresenta a... Ogni parte
è parese.*

ATTO PRIMO

SCENA PRIMMA

*Don Peppe co notavolino nnante , revedenno
le nnote de lo spezeiale.*

Tre, e ddoie fanno cinco... e ccinco? dece...
E ddece? vinte. Appriesso :
*Mprimma matina de li vintiquatto ,
Na bella serenbella
Doce doce , apretiva , e azzeccosella ,
Pe nzuccarare , e rrecreià le biscere
De lo ditto signore.... Sso Don Micco
Sapria mannare no vasciello a ppicco
Co ssa bella rettoreca , o rettorio.
Pe nzuccarare , e rrecreià le biscere
De lo ditto signore , tre carrine.
Tre ccorna a lo servizio! Non avasta
La creianza ; nce vole la coscienza ,
Pe no scortecà vive li malate.
Na serenbella tre carrine? Canchero!
A l'ate note sta pe duie carrine ;
E dduie carrine a llengua spezialesca*



Fanno na pennarella. Mo acconc'io :
 No carreniello. Appriesso :
Lo stisso iuorno a ll' ore dicisette ,
No guappo lavativo
De rabarbaro , mele , e tutte spezie ,
Secunno la ricetta de lo miedeco ,
Pe llavare , e annettà comm' a n' argento
Lo ventre , e le stentina .
De lo ditto signore , tre carrine.
 Tre llogna pe tte stennere lo cuollo !
 No carreniello. Appriesso :
Lo stisso iuorno a ll' ore vintiquatto ,
De gileppo n' estratto
Epateco , simpateco , e stommateco ,
Pe ffà dormì nfì a ghiuorno lo signore ,
(Miezò donato) trentacinco rana.
 Aggio tuorto : dormiette comm' a puorco.
 Donca , vinte carrine , duie carrine ,
 E trentacinco rana fanno ntutto
 A lo paiese mio
 Docate duie , rana cinquantacinco.
A la matina de li vinticinco ,
No decotto attonante
De siena de Levante , campomilla ,
Marva , e ccassia , secunno la ricetta
De Don Arazio , p' ammattà la bile

De lo ditto signore, na patacca.
Na patacca nfocata iusto nfronte.
Don Arazio n' ha ditto ca me spuoglie.
Mettimmo la mmità, meza-patacca.
So bintotto carrine iuste iuste.
Appriesso : a l' ora tarda ,
No pinnolo d' oppiata sedativa ,
Pe ffà venì lo suonno
A lo ditto signore, tre carrine.
E sso trentuno. Appriesso :
A l' arba de lo iurno vintiseie ,
No lavativo pe ffà tutt' ascire
E pe ccoppa, e pe bascio
L' aria fratosà carcerata neuorpo
De lo ditto signore, tre carrine.
No carreniello : e stammo a trentaduie.
Appriesso : reprecato
Lo stisso lavativo vierzo sera ,
Tre carrine. Compà, no carreniello.
E stammo a tre docate, e tre carrine.
A tridece ore de li vintisette
Na medecina pe ccaecià li mucche ,
E l' ommore che tene nzine-fine-
Lo povero signore, tre carrine.
Stammo a tre pezze. Appriesso :
A li vintotto, latte nmedecato ,

P' accarezzare , e refrescà lo sango
De lo ditto signore , no tarì.
 No carrino: e ccontentate accossì.
 Docate tre , grana sittanta. Appriesso :
Na pozione cordiale , fatta
Co n' onza de leozaccaro ,
Sceruppo de limone , e de granato ,
Ed ate ngrediente , seie carrine.
 Seie palle nfronte ! Chi vo stà malato ,
 Co sse note che faie , Don Micco mio ?
 Na patacchella ; e stammo
 Iusto a quatto docate , e dduie carrine.
 Donca dint' a sto mese aggio pigliato
 Otto bobbe pe ccoppa ,
 E llavative dudece pe bascio.
 So ghiuto scarzo assaie. Lo mese nnante
 Pigliaie dudece bobbe ,
 E binte lavative , e stiette meglio.
 N' aggio a ffà ntiso Don Arazio , ed isso
 Nce ha da mette remmedio. Eilà , sfrattammo
 Ste stroppole... Ma ccà no nc'è nesciuno ?
 Me vonno sempe lassà sulo ; e agnuno
 Me fuie comm' appestato.
 Aggio donca a ssonà lo campaniello :
 So tutte mmuorte accise. (*sona*)
 E no nc'è proprio muodo. (*sona*)

E ccomme non sonasse. (*sona*)
 Rosella! (Io mo m' arraggio.)
 Ah ciantella! Frabbotta!
 Mo la meuza mme sbotta. Hanno chiantato
 No povero malato? Tutte s'hanno
 Posta a le rrecchie la vammace vergene.
 Canchero! Comm' a cane ccà morì
 Me farriano accossì.

SCENA SECONNA

Don Peppe, e Rosella.

Ro. Sto ccà.

Pe. Puozze provà la guigliottina
 Co boia malo pratteco!

Ro. Mmardetta
 Ssa pressa che ttenite! a ttanta strille
 Penzanno a ccorre sulo,
 Aggio pigliato mo no sciuliaculo.

Pe. Vaiassa!

Ro. Uh uh!

Pe. È cchiù de n' ora....

Ro. Ih Ih!

Pe. Che m' aie chiantato....

Ro. Oh Oh!

Pe. Te vuoie stà zitto,

O mo te scioffo?

Ro. Oh bella! Io sto scioffata.

Pe. Tu n'ato poco mme facive scennere

La guallara strillanno.

Ro. E n'ato poco

Vuie co tanto sonare mme faciveve

Rompere na costata. Uno pe ll'auto,

E accossì stammo parapatta, e ppace.

Pe. Ah ntapechera!...

Ro. Si strillate, chiagno.

Pe. Io me lagno...

Ro. Uh uh uh!

Pe. Ca me chiantaste.

Ro. Ih Ih!

Pe. Non pozz' avè manco lo sfizio

De sfocà?

Ro. Sì, sfocate a ggenio vuosto.

Pe. Tu no mme faie rapì manco la vocca.

Ro. E cchi ve tene? Avite vuie lo gusto

D' allucare? ed io tengo

Lo piacere de chiagne nfì a dimane.

Le ppartite sso ghiuste.

Pe. Va, stutammo

Sto locigno. Schiattosa,

Sfratta sso tavolino. Ne, a proposeto:

Lo lavativo d' oggi ha fatto effetto?

Ro. Lo lavativo, che v'avite fatto?

Pe. E quale? chillo che non m'aggio fatto?

Ciuccia! Ne' era assai bile?

Ro. Che ssaccio: io non me ntrico

De ste schefienzie lloco.

Don Micco, che se piglia li denare,

Isso lo naso suo ne ha da ficcare.

Pe. Tenite sempe l' acqua cauda lesta,

Pe l' ato lavativo.

Ro. Sto Don Micco,

E Don Arazio stanno

Buono a spassarse co lo cuorpo vuosto;

E cchest' è zezzenella, che le renne

Cchiù de na massaria.

Ddinmannà le vorria,

Vuie che mmale soffrite, ca ve danno

Bobbe da capo nfino a ccoda d' anno.

Pe. Va parla de colata, e de renacce,

Nè mette vocca a mmiedece! Vorria

Figliama Nicoletta a sto momento,

Pe pparlarle sottile.

Ro. Veccola ccà, mo vene. Comm' a zincara

Mo arrevata d' Agitto,

Ha nnisso nfatto a ppilo mnevenato

Zo, che avite penzato.

SCENA TERZA

Don Peppe, Nicoletta, e Rosella

Pe. Figlia mia cara, luposesto nfraveca,
Mo mannav'a cchiammarte.

Ni. E sso benuta.

Pe. Aspetta, Nicolè, ch'io vaco, e ttorno.
Rosè, va piglia lo bastone mio
Vecin' a lo cummò.

Ro. Facite buono;
Iate priesto. Don Micco è no grann' ommo:
Ve cchiammate Don Peppe?
Ed isso fa passarve
Tutta la vita ncopp' a no sì peppe.

SCENA QUARTA

Nicoletta, e Rosella.

Ni. Rosè!

Ro. Che nc' è de nuovo?

Ni. Guardame nfacce.

Ro. Chesto sto facenno.

Ni. Rosè!

Ro. Tornammo a ccoppa.

Ni. Tu già soppune che tte voglio dicere :

Ro. La lengua vatte addò lo dente dole.

Mme volite parlà de Don Camillo.

Ntra de nuie sto trascurzo

Pe ttutta sta settimana è stato ncurzo ;

E ssi non lo facite

Pe na mez' ora , la paturnia avite.

Ni. Puozz' esse benedetta ,

Pe non dicere accisa ! Tu saie chesto ,

E aspiette ch'io la primma

Te ne parlo ?

Ro. Ma vuie non date tiempo ;

Facite sempe n' arte.

Ni. Io lo canosco ;

Ma non me fido a mmetterce remmedio.

Ma tu , Rosella mia , dillo ncoscienza :

Mme daie tuorto s'io penzo a Camilluccio ?

Ro. Tuorto non ve darria manco no ciuccio.

Ni. Non faccio buono de portarle ammore ?

Ro. È n' obbreco de core.

Ni. Chillo si non me vede è affritto e sfritto ,

Ed io resto accossì ?

Ro. Non sia pe ditto !

Ni. Dimme tu mo : la canoscenza nosta

Non fuie pe me na sciorte ?

Ro. Sciorte vosta.

Ni. Piglià de core le defese meie ,
De prencepe non pare n' azione ?

Ro. De prencepe , de conte , e de barone.

Ni. Senza ch' una lo preca ,
Farse tanto lo piezzo ?

Ro. E cchi lo mneca ?

Ni. E l' affare trattà co tutto core ,
Co tutta polizia ?

Ro. Vero signore !

Ni. Non puoie ddì che sia brutto , che sia friddo
E d' anema , e de faccia.

Ro. È no Copiddo.

Ni. Veste sempe co gusto , ed appuntino ,
Mmoda da meglio a mmeglio.

Ro. È figurino.

Ni. Si prommette na cosa , non te chianta ,
Duorme a quatto coscine.

Ro. Anze a quaranta.

Ni. So li trascurze suoie , Rosella mia ,
Zuccaro e mele.

Ro. So na speziaria.

Ni. Rosella mia , lo core che tte dice ?
Camilluccio è fedele , o me coffea ? -

Ro. Casamia ccà nce vole ,
Che mena a nnevenà pe ttutto l' anno
Si ddelluvia , fa viento , o nc' è lo sole.

Ni. Che carola m' aie posta a lo cerviello!

Ro. Chesto e nniente è ttutt' uno : bello bello.

Le mannasteve aiere la mmasciata ,

Ca si volea tenè pede a lo singo ,

A lo guore v' avesse addimmannata

Pe mmogliera ? e ntra n' ato pocorillo

Se vedrà si è brillante , o pur' è brillo.

Ni. Sichisto è fauzo , cchiù non boglio credere

A l' uommene , Rosè , quanto so luonghe.

No. Mo torna lo patrone

Da licette , e s' apponta lo cazione.

SCENA QUINTA

Don Peppe , e Ddette

Pe. Figlia mia , che notizia , ma de truono !

Tu restarraie nsentirla

Co la lengua da fore.

Te vonno nguadià.... Vi comme faie

Lo pizzo a rrisa ? ssa parola azzecca

Mmocca a buie , zetellucce , comm' a bisco.

Sarria schitto parlà pe ffà sputazza ,

L' addimmannarte si acconsiente.

Ni.

Gnore ,

Gnore mio bello , io voglio

Obbedirve gnorsì ntutto , e presutto.

Pe. Sapenno de che panno tu vestive ,
Aggio conchiuso già l'affare.

Ni. Io vengo

Appriess' a buie comm' a ccecata nata.

Pe. Moglierama, matreata aveva penzato'

Farte monaca , e ffarce

Rita porzì co ttico ; ma deciette :

Non signore, n' ha luoco l' addimmanna.

Ro. (La vorpa non se mbroglia ntra la folla.)

Pe. Donna Popa faceva la nfernosa ,

Decenno, non è ccosa ; ma so stato

Tuosto , e a puorto lo vuzzo aggio portato.

Ni. Io ve rest' obbrecata pe la vita.

Ro. Signore mio , pe ssa penzata vosta

Mo ve farria na statola de marmo.

Pe. Pe ddì la veretà , sso tale zito

No lo saccio nfì a mmo manco pe prossemo ;

Ma pe quant' aggio ntiso ,

Restarrimmo contiente tu, ed io.

Ni. So contenta da mo.

Pe. Donca l'aie visto?

Ni. Gnopà , co buie mo parlo

Lo linguaggio d' Adamo. Da seie iuorne

Sso giovane vediette ; e la mmasciata

Ch' avit' avuta , mprimmo combinata

Ntra le doie parte contraente fuie.

Pe. Chesto m'arriva nuovo :

Nè boglio trovà pilo dint'a l' uovo ,

Scrutinanno lo comme. Mperò sento

Che frostiero non è, ma cetatino.

Ni. Cetatino gnorsi , non de Sorriento.

Pe. Ha taglia vantaggiosa , e n' è pupazzo.

Ni. Vedite no giagante de Palazzo,

Pe. È bello de fegura.

Ni. Pare na miniatura.

Pe. È n' agnelillo.

Ni. Nnozente comme fosse peccerillo.

Pe. Nasce co tutta l' obbrecazione.

Ni. Essere non pò maie no lazzarone.

Pe. Parla grieco.

Ni. No ssaccio : si lo veco ,

L' addimmanno si veve asprinio , o grieco.

Pe. Sarrà da ccà a tre ghiuorne addottorato

Miedeco ncartapecora.

Ni. Miedeco?

Pe. Sì : non te l' aveva ditto?

Ni. Maie tale cosa : e cchi l' ha ditto a buie ?

Pe. Don Arazio.

Ni. Che fuorze lo canosce ?

Pe. Vì che ddimmanna ! Chillo l' è nepote.

Ni. E Camillo è nnepote a Don Arazio ?

Pe. T'u qua Camillo , e ccampomilla ? Io parlo
De lo zito.

Ni. Ed io puro parlo d'isso.

Pe. Ed è nnepote a Don Arazio , è ffiglio
De Don Diaforio lo cainato suio ;
E se ccchiamma Diaforio , e non Camillo ,
Comm' a ccapocchia toia l' aie vatteiato.
Stammatina nc' è stata sessione
Ntra me , Don Micco , e Don Arazio ; e craie
Sso iennero futuro co lo gnore
Verrà da me... Ched è ? te sì ghielata ?

Ni. Gnopà , nn' una parola :

Vuie state a Trocchia , io stong' a Pascarola ;
Vuie parlate de Tizio , io de Zempronio.

Ro. Signò , vuie pazziate ? Site ricco ,
E bolite na figlia mmaretare
Co quarche maniscarco pacchesicco ?

Pe. Abboffa , muccosella sbruffallesse.

Ro. Me pigliate nzavuorio ? Raggionammo
A sango friddo. Vuie pecchè volite
Fà sse nnozzole ccà proprio de Zeza ?

Pe. Vedennome che baco mpilo mpilo
Co la salute ad orza , voglio a scianco
No iennero ch' è mmiedeco , e cche tēga
Miedece pe ppariente.
Ccossì faccio stà a ppasto ogne malanno ,

Tenenno int' a la casa tutto l'anno ,
 Senza spenne cchiù n' ette ,
 Chi mme tocca lo puzo , e ffa ricette.

Ro. Mo nce ntennimmo a ssisco. È no piacere
 Parlà co pausa : ma , signò , decite
 A sscie uocchie ntra nuie : vuie che soffrite ?

Pe. Tu lo puozze provare ,
 Trippa de sette sapate !

Ro. Aggio tuorto :
 Gnorsi , state malato , anze ve dico ,
 Che da ccà a ccient' at' anne
 Restate senza naso. Ma ntramente
 La signorina mia ,
 Che pe sciorte non tene malatia ,
 N' ha bbesuogno de miedece pe zite.

Pe. Io lo ffaccio pe mme , l' utele è minio
 D' apparentà co mmiedece ; e na figlia
 Che sa l' obbreco suio comme commene ,
 Ha da caglià , nè ffà la maramene.

Ro. No consiglio ve do , che ha no Banco.

Pe. Lo Banco de lo Sciulio.

Ro. Qua demmonio

Cacciate da la mente
 Sso brutto matremmonio.

Pe. È lo pecchè ?

Ro. Pecchè la signorina ,

La capo auzanno , ve derrà , non quaglia.

Pe. Non quaglia , mme derrà ?

Ro. Ma chiatto, e ttunno.

Pe. Figliama ?

Ro. Ncarne , ed ossa. Chella tene

Care care a li bene

Li Diaforie seniure , e iuniure ;

E ttutte li dotture

De ssa brutta Diaforeca streppegna

Vorria vedè bballà ncopp' a tre llegala.

Pe. Ed io vorria vedè ncopp' a no trono.

Chest' è na sciorte nsuonno. Don Diaforio

Tene pe razia sso fegliulo , e cchisso

È l' areteco... no! l' arede suio :

E Don Arazio , che s' ha puosto ncapo

De morì co la parma , a sso nepote

Lassa tutta la robba ; e nfì a sto punto

Assomma a trentamilia e cchiù docate.

Ro. Vì quante nfì a sto punto avrà mannate

Figlie de mamme a requià , pe ffarse

Tanta denare? e non è niente ancora.

Pe. Trentamilia docate ! Terratienete !

Ro. Sti bisticce , e ppasticce

Che nce contate , songo belle e buone ;

Ma vattimmo a lo sodo :

Sceglite n' ato zito cchiù a proposeto ;

Pocca a la signorina ssa casata

Diaforia sona qua casata Sposeto.

Pe. Io voglio fà sse nozzole.

Ro. Puh puh !

Pe. Non è ccosa ?

Ro. Gnernò.

Pe. La ntuppe tu ?

Ro. La ntoppa tutto lo neverzo munno.

Pe. Non mme ne preme. Io pidete

Non piglio pe mbommarde ; e Nicoletta

De cchisto sarrà sposa.

Ro. State frisco , signò, comm' a na rosa.

Pe. Co lo tiempo , e la paglia

'S' ammatatura lo niespolo.

Ro. No chisto.

Pe. O lo sposa , o la mecco mmonasterio.

Ro. Chi ? vuie ?

Pe. Ca chi ?

Ro. Iusto accossì.

Pe. Mmalora !

Ro. Che mmonasterio !

Pe. Nce la pozzo chiudere ?

Ro. Gnernò.

Pe. Vì che commeddia ? È ffiglia mia ,

E non la pozzo mette pe dducanna.

Ro. Chi ve dice de sì , Don Pè , ve ganna.

Pe. Chi me ntoppa?

Ro. Vuie stisso.

Pe. Io?

Ro. Sissignore.

E avite ochisso oore?

Pe. Tanto bello.

Ro. Coffeiate.

Pe. Gnernò.

Ro. L'essere patre....

Pe. E li patre decidenò st' affare.

Ro. Na lacremella a ttiempo, no squasillo,

No ddì, tatagnorillo, co na voce

Azzeccosa, farranno

Addeventarve sosamiello doce.

Pe. Canzona moscia.

Ro. Iusto.

Pe. Comme?

Ro. Site

No patre d' oro.

Pe. E quanno voglio, songo

D' arzeneco.

Ro. Ne, ne, vuie non penzate

Che malato mo state?....

Pe. Io penzo schitto

Che Nicoletta ha da obbedì.

Ro. Che risa!

E lo consenso mio ?

Pe. Tu l' aie cacata ?

E cche fuorze iocammo

A mazza e piuzo , o a scarreca varrile ?

La vaiassa patrona....

Ro. Quanno vuie

Facite dà la capo pe le mmura

A le ggente , v' averte la vaiassa.

Pe. Mo faccio farte teretuffe nterra.

Ro. Io me reparo co sto seggiolone ,

Pe non ve fà trattà da lazzarone.

Pe. Spilarraie pe paura lo connutto ,

Nfì che non aggio sto bastone rutto.

Ro. Seng' obbreccata de non farve fare

Le pazzie d' Abbruzzise ,

Pe. Cana perra !

Ro. Io non boglio sse nozzole.

Pe. Mmardetta !

Ro. E proprio na vriogna

No miedeco pe ghiennero.

Pe. Carogna !

Ro. Ha da sentì echiù a mme , che non a buie.

Pe. Colè , pigliala tu pe la gonnella ,

E nfì ch' io non arrivo , tienemella.

Ni. Penzate a la salute....

Pe. O tu l' affierre ,

A mmorte non te lasso

Manco no zerre-zerre.

Ro. Si non ve sente , ad essa

Io lasso desponibbele , e lleggitema.

Pe. Io mo me ietto ncopp' a sto sofà :

Cca pe forza me vonno fà crepà.

SCENA SESTA

Don . Peppe, e Donna Popa.

Pe. Popa , popella de chist' uocchie mieie ,
Quanno venive!

Po. Bello mio , ch' è stato?

Pe. Soccurrerme.

Po. Pecciuottolo de st' arma !

Pe. Fata Morgana.

Po. Muorzo de reggina.

Pe. Mme fanno piglià collera.

Po. So morta !

Pe. Rosella la mpesella

Non fa chiovère cchiù , fa fà delluvio.

Po. Bello bello.

Pe. A negà ch' io sto malato?

Po. Steva mbriaca.

Pe. Tu bbè saie lo tutto.

Po. Ha tuorto a non presutto.

Pe. Chella me farrà stregnere p' arraggia
Lo vico de le ttozze.

Po. Arrassosia !

Pe. Chella è la corpa de la bile mia.

Po. E buoie fà ncopp' a ccuotto acqua volluta ?

Pe. Da no siecolo e mmiezo sto decenno ,
Dalle no caucio, e mannannella.

Po. Siente :

Le baiasse , e criate

So nemmice pagate , e zo è lo vero :

Ma mannaggia lo meglio ntra li lupe.

Rosella è attenta , e ppuntoale , e cchesta

Vertù la fa tenè mparma de mano.

Mo nce remmedio : cilà , Rosè , t' azzecca.

SCENA SETTEMA.

Rosella, e Dditte.

Ro. Sto cca.

Po. Comme ? Chi tene la salute

De la vera carrafa de la Zecca ,

S' ha d' arraggià pe tte ?

Ro. De sso trascurzo ,

Signora mia , no ntenno na parola.

Io sto a spassarlo.

Pe. Ogne boscia na mola.

Po. Nce decea lo signore ca voleva

Dà la figlia a no cierto Don Diaforio ;

Ed io lo persuadea de la mannare

A mmagnare meneste a rrefettorio.

Po. Chist'è bero consiglio

De cchi mmentate la porva pe sparare.

Pe. Non mmoccarte ssi pinnoles : la mpesa

Sa fà na facce nnante , e n' ata reto.

Po. Te credo , Peppe mio. Penza a carmarte.

Rosè , sienteme buono :

Si tu da mo nnenante

Faie piglià cchiù lo musso a sso fatone ,

Te lecenzo. Ntramente porta subbeto

Lo roccappotto suo de peloncino ,

E tre , o quatto euscine. Peppe caro ,

Ncasa lo barrettino nfi a le recchie :

Mme dicen le becchie

Che pe le recchie trase lo mal' ario,

Mitte lo tafanario a sta portrona.

Pe. Tu m' attacche pe schiavó.

Po. Statt' accuoncio ,

Caudo caudo accossì , comm' a berola.

Sto coscino va a rritta , e st' auto a mmanca ,

Chisto reto a le spalle , e cchisto sotto.

Ro. E cchist' urtemo ncapo ,

Pe ppoterve guardà da lo ssereno.

Pe. Te lo voglio dà nfacce ! Te ne fuie ?

Mo m' affocava.

SCENA OTTAVA!

Don Peppe, e Donna Popa.

Po. Bene mio ! Che fuie ?

Pe. Mpietto m' ha fatto fà tuppete tappe.

Po. Ma pe fine de bene , e non de male.

Pe. Io chisso bene suio tengo a li bene.

Pigliaie na 'scoss' alettrecà ; e nce vonno

Pe ttornà buono seie restorative ,

E ddece lavative.

Po. Piglia sciato.

Pe. Tu , schitto tu non faie magnarme agresta.

Po. Core mio.

Pe. Pe tte rennere l' ammore

Che tu mme puorte , comme te deciette ,

Voglio fà testamento.

Po. Arrassosia !

Vasta , zuffice ccà , non sia pe ditto !

Pe. Io tt' avvisaie parlarne

Co no quarche notaro , che tt' è anmico.

✱

Po. E sta llà dinto ; lo portaie co mmico,

Pe. Fallo trasì.

Po. Quanno addavero s' amma

No marito , e tt' è ccaro ,

Non se penza a sse ccose. Eilà , notaro.

SCENA NONA

Don Malarìo , e Dditte.

Pe. Bemmenuto , notà : Mo ccà assettateve,

Moglierema m' ha ditto che buie site

Ammico suio , ed ommo de coscienza ,

E non fede-de-mmmerda , co llecenza.

La precaie de nformarve

Ch' io voglio fà lo testamento , e...

Po. Zitto!

Ch' io moro cessa a mmaggenarlo schitto,

Ma. M' ha nformato de tutto : ma ve dico ,

Che stannoce li figlie ,

Lo testamento non pò fà passare

Tutta la robba a la mogliera,

Pe. E ccomme?

Ma. Lo Codece è ccontrario : se pò sulo

Lassà la desponibbele.

Pe. Chesto pare mpossibbele ! Non pozzo

Lassà tutto a mmoglierema ? Ne voglio
Fare stà ntiso lo paglietta mio.

Ma. È na via che no spona. Li pagliette
Ncopp' a cchesto so ttuoste cōmin' a ccuorne ;
E credeno ddellitto
Contr' a la legge de trovà cavicchie ;
E tte metteno ncampo scrupolicchie.
Meglio è mpattà lo sbirro , ca lo iodece.
Se consurtano chille ,
Che stann' int' a la pasta , e da sse ccose
Ne cacciano le mmano ;
E ecco no tiritappe , e ttirituppe
Zompano ncopp' a ttutto a picde chiuppe.
Senza sto spiercio le ghiornate sane
Starriamo sempe a nce scioscià le mmosche.
Mo nce vo : mmenta legge , e mmenta frode ,
E ffaie raspà la ggente addò non prode.

Pe. Decea buono moglierema , ca vuie
Sit' ommo e quarto, anze parente a Chiochiaro.
Nzegnateme la via
Comme l' aggio a lassà la robba mia.

Ma. Lo remmedio no nc' è schitto a la morte.
A no fedele ammico ,
Che non ve pò fà nfacce po na fico ,
Fengite case , e mmassarie de vennere ;
E cchillo a mmorte vosta

Co Donna Popa se la potrà ntennere.

A n' at' ammico puro cordiale

Debbetore fengiteve ncambiaie ,

Azzò da ccà a ccient' anne

Ncopp' a la rredetà l' assigga , e allora

Pro manibus ne gode la signora.

E da mò le potite

A quatt' uocchie , e nsecreto consegnare

Li contante e l' argiento , che tenite.

Po. A cchesto non penzà , Peppuccio mio.

Pe. Gioia !

Po. Quanno tu muore , ma sia tardo ,

Mme spettarrà a scòlà peo de lo llardo.

Pe. Mogliera mia !

Po. Che resto a ffà a lo munno ?

Pe. Core !

Po. Si muore ciesso ,

Quanno t' abbè tu , me vide appriesso.

Pe. Consolate.

Ma: Sso tiempo n' è benuto ,

E ffacite sso trivolo vattuto ?

Po. Vuie non site nzorato , sì notaro ,

Pe pparlà de ste doglie.

Pe. A lo mmacaro

Co ttico avess' io fatto no fegliulo !

Don Arazio voleva

Mannarte a Casamicciola , o a Pezzulo.

Ma. Sta ntiempo ancora , quanno ven' Agosto.

Pe. Va , penzammo pe mmo a lo testamento ,

Zoè , fà comme lo notaro ha ditto.

Ma mprimmo , e nnantemonia

Te vorria conzegnare

Quattomilia docate d' oro nuovo ,

Che stanno chiuse arret' a cchill' arcuovo ;

E ddoie cambiale traettizie a bista

Ncopp' a la Ditta Sisto , e Giammattista.

Po. Non boglio niente , proprio niente... Quanta

Sò li denare int' a l' arcuovo ?

Pe. Songo

Quattomilia docate , Popa mia.

Po. No mme parlà cchiù de denare... E cchelle

Doie cambiale?

Pe. L' una è d' ottociento ,

L' auta de mille , e seie docate.

Pe. Io voglio

Schitto che tu staie buono.

Ma. Si volite

Mette lo niro mo ncopp' a lo ianco ,

P' assecurà st' affare...

Pe. Iammoncenne

Dint' a cchell' ata cammara pe stare

Cchiù coiete , e spicciammonce. Popella ,

Damme lo vraccio.

Po. Veccolo Peppuccio :
Parimmo , cammenanno mmuodo tale ,
Marco , e Sciorella proprio natorale.

SCENA DEGEMA

Nicoletta , e Rosella.

Ro. Signorì , ve l'avviso ,
E doppo me ne scotolo li panne.
Lo notaro è benuto , ed aggio ntiso
Nnommenà testamento. Aggio a paura
Ca la signora ve vo fa restare
Co diente asciutte , e cannarone sicco.

Ni. Faccia lo gnore zo che bo : la robba
È soia , ma non avria da trommentare
Sto core , ch' è lo mio.

Soccurrere , Rosè , ntra tanta guaie.

Ro. Lo sango mettarria pe cconsolarve.

Donna Popa vorria

Terarme a vierzo suio ; ma chella femmena.

No mme va proprio a genio. Io pe sservirve ,

Vedè farraggio che ve so contraria ,

Pe scovrire che biento assomma nn' aria.

Ni. Pe ccaretà , mo fà sapè a Camillo

Sto matremmonio asciuto ncampo.

Ro.

Pozzo

Abbiarce Coviello,

Chill' usuraro puorco, che borria

Sposarme : le farraggio

Vedè la luna int' a lo puzzo ; e zuffece.

Ma è tardo mo : pe craie

Ve servarraggio, e a sto commanno mio

Chillo grà ntorcia se farrà de fuoco.

SCENA UNNECEMA

Donna Popa da dinto, e Ddette.

Po. Rosè, Rosè, viene da me no poco.

Ro. Signorì, so cchiammata. Allegramente ;

Çcà no ballo vedimmo de pezziente.

Scompetura de lo Primm' Atto.

ATTO SECUNNO

SCENA PRIMMA

Antecammara de Don Peppe.

Rosella non canoscenno Don Camilluccio.

Ro. Signò, chi commannate?

Ca. Chi commanno ?

Ro. Vuie site, atta d'aguanno ? Ecche bolite ?

Ca. Sapere si mme spettano

Carizze, o ccortellate; simme tocca

Bemmenuto, buon prode; e ssanetate,

O no caucio a lo sidece. Coletta

M'avria da ddì che penza de sse nozzole.

Ro. Signore mio, chell'è guardata a bista

Comm'a no connannato,

Enon se coglie manco a la fenesta.

Na sora vecchiarella de Don Peppe

Nce fice avè la razia,

Mperò na vota schitto, senz'asempio,

De ire a lo triato; e ntra vuie duie,

Co lo smicciarve chella vota sola,

De sposarve ve venne cannavola.

Ca. Io non so, figlia mia, no maromene,
 Che tre cicere mmocca manco tene.
 So benuto qua mmasto de cappella,
 Ncagno de cchillo, che dà lezzione
 A Çoletta.

Ro. Peppoco ascite fore,
 Quanto ne faccio ntiso lo signore.

SCENA SECONNA

Don Peppe, e ppo Rosella.

Pe. Don Arazio ordenaie ch'ogne matina
 Avesse passciato int'a sta cammara
 Dudece vote a ghire,
 E ddudece a benire,
 Doppo lo sfratto de lo tafanario,
 Ma no saccio si a llungo o pur'a llario.

Ro. Signò!

Pe. Voce de cantaro scassato,
 M' aie ntronata la capo. A no malato
 Se parla zitto zitto, e mmo è buon-tuono.

Ro. Voleva di...

Pe. Parla co la sordina.

Ro. (Mo fengo de parlà.) Pi.. pi.. pu.. pu..

Pe. Che ne vutte?

36

Ro.

Ca.. ca..

Pe.

Fosse nsorduto !

Io non te ntenno.

Ro.

Çcà no galantommo

Pe pparlarve è trasuto.

Pe. Chest' è ttutto ? Che sia lo bemmenuto.

SCENA TERZA

Don Camilluccio, e Dditte.

Ca. Signor Don Peppe , io veco....

Ro. Sî Don Tale de Tale mio patrone ,

Penzate ca parlate a no malato ,

Donca cchiù zitto , e cchist' è lo buon-tuono.

Ca. Io veco , e mme consolo ,

Che parite na pasca.

Ro.

Che sproposeto !

Lo signore me pare quaraiesema ,

Co la salute soia fa lo funaro.

Ca. M'hanno ditto che ghiea da meglio a mmeglio;

Nè la facce mme pare de malato.

Ro. V' avite d' accattà n' acchiale ausato ,

Proceta no bedite : e cchille sceme

Che v' anno ditto che passava meglio-

Sarranno coffiature , o palloniere.

Pe. Sse parole so bere.

Ro. Fiacco non sta , dorme nov' ore , magna
Quatto piatanze , rompe cchiù botteglie ,
E lo mpuro da cuorpo caccia fore :
Ma pe cchesto sta buono ? non signore.

Pe. Ha raggione.

Ga. Aggio tuorto. M' ha mannato
Lo masto de cappella Don Martino ,
Ch' è ghiuto fora a bennerse lo vino :
E ccomme simmo nzembra carne ed ognà ,
Vo ch' io faccia ped isso
Lezione a Donna Do... la signorina ,
Fegliola vosta.

Pe. V'aggio ntiso. Va ,
Rosella , e cchiamma Nicoletta ccà.

Ro. Scemamente io derria
Che ghiessero a ccantare ngallaria ,
Sibbè llà stia scopanno lo criato.

Pe. Gnernò !

Ro. Ma ccà cò grà suggezione ,
Farriano nnant' a buie la lezione.

Pe. Gnernò !

Ro. La signorina , quanno canta ,
Tene na voce sperciativa , e cchella
Ve ntronarrà le rrecchie , e le ccervella.

Pe. Statte zitto , vaiassa !

La museca me spassa : ma già veco
 Nicoletta venire. Tu ntramente
 Vide si Donna Popa s'è bestuta.

SCENA QUARTA

Don Peppe, Nicoletta, e Don Camilluccio.

Pe. Figlia mia, sì a proposeto venuta.
 Lo masto de cappel la Don Martino
 È ghiuto a benne vino, e ncagno suio
 Ha man nato Don...

Ca. Fistolo.

Pe. Don Fistolo

(A ll' ossa soie) pe darete lezione.

Ni. Aimmè !

Pe. Ch'è stato ? aie visto lo mammone ?

Ni. Che succè...

Pe. Tu che dice ?

Ni. Che succede !

Sta notte me sonnaie ch'io stea perdenno
 Na causa Mmicaria, quann' arrevanno
 No paglietta primmario ,
 Ma tale quale spicciato chisto
 Signore , m' ha defesa a ritta e a mmanca ,
 E ne so asciuta pe la maglia franca.

Ca. Sibbè sia chesta na fortura nsuonno
 Pe mme, che no sto ntiso
 De materia legale,
 Ch' è na materia vera,
 Che appesta e fruscia cchiù de lo Colera.
 Puro si pozzo darve qua soccurzo,
 Comme nsuonno so curzo,
 Corraraggio scetato a ve defennere.

SCENA QUINTA

Rosella, e Dditte.

Ro. Si ve diette a rrentennere
 Tanta mpocchie, signò, mò so pentuta;
 E a dirve so benuta che ccà stanno
 Li Don Diaforie patre, e figlio, e bonno
 Trasi. Signò, lo zito è no fegliulo
 Bello isso sulo. E ssi la signorina
 Sso guappo matremmonio non approva,
 La pporto a lo Ncurabbbole,
 E m' abbusco de botta le ccient' ova.

Pe. Don Fistolo volite fà partenza?
 Gnernò; potete starve. Io mo marito
 Figliama, e presentato
 Ccà le sarrà lo zito.

40

Ca. Tropp' annore ,
Che abbottare me fa qua ranavuottolo.
Dì buon prode a lo sposo.

Pe. Chiss' è figlio
De miedeco primmario , e nquatto iuorne
Se farranno le nnozzole.

Ca. Ben fatto.

Pe. Screvite a Don Martino ,
Che subbeto tornasse , pe provare
Li stracquine , e cconfiette de la zita.

Ca. Pe la Piccola-Posta nce l'avviso.

Pe. Spero che puro vuie m' annorarrite.

Ca. Troppo comprito site.

Ro. Zitto pe mmo , signure ,
Ca trase la pareglia de dotture.

SCENA SESTA

*Don Diaforio seniore , Don Diaforio iuniore ,
no criato, e Dditte.*

Pe. Scusateme , s' io tengo
Lo barrettino ncapo : Don Arazio
Non bo che me lo levo : e buie che site
De l' arte , mbè sapite
Che ne potria venì.

D. S. Nuie visitammo
 La ggente pe ssanarla , e non pe ffarla
 Mori co cchiù dochezza ,
 Comm' ha stampato lo Barone Zezza.

Pe. Don Diaforio...

D. S. Don Peppe...

Pe. Co piacere...

D. S. Ccà venimmo...

Pe. Recevo tant' annore.

D. S. Figliemo , ed io pe ve potè de core
 Rengraziare.

Pe. Io stisso de perzona

Sarria venuto ncasa vostra....

D. S. Stammo

Co la facce pe tterra....

Pe. Pe sse nozzole.

D. S. Pe cchessa parentela. Figlio mio ,
 Sputa , e ppo fa li compremiente attuorno.

D. I. Me pare che lo primmo è pe lo gnore ;
 Non m' allecordero buono.

D. S. Sissignore.

D. I. Aggarbato Don Peppe ,
 Pape Satan Aleppe , io nvue canosco
 No secunno gnopatre : e ssi contanno ,
 Lo nummero secunno
 Vene dopp' a lo primmo , nchisto caso

Piglia lo primmo puosto. Tata mio
 Me fice, e buie m' avite ncaparrato ;
 Chillo pe fforza m' ha nfà a mo campato ,
 E buie po ricevuto pe favore.
 E ccomme lo morale
 De lo corporeo e ffiseco cchiù bale ,
 Io rengrazio cchiù a buie , che no a lo gnore ,
 Pe l' antico decreto de consiglio ,
 Meglio è l' essere iennero , che figlio.

Ro. (Chest' è nova diarrea che spila , e sbocca
 Pe lo tafaro no , ma pe la vocca.)

D. I. Gnopà , so ghiuto buono ?

D. S. *Mirabiliter.*

Pe. Nicolè , penza a fare a sso signore
 Na reverenzia , e ssia nterza minore.

D. I. Gnopà , do fuoco appriesso ?

D. S. Fatte annore.

D. I. Dopp' avè dato già n' uoechio a lo pesce ,
 Dongo l' ato a la gatta ,
 Ed a buie , socra mia , femmena fatta....

Pe. Va chià : chessa mm' è figlia , e non mogliera .

D. I. E addò sta la mogliera ?

Pe. Sta venenno.

D. I. Aspettammo , gnopà ?

D. S. Puoie fà ntramente
 Lo trascurzo a la zita , ch' è presente.

D. I. Signorina mia bella ,

Io la statola so de Menuone ,

Che sonava essa stessa , posta nface

A lo sole-lione. Io so lo sciore

Chiammato girasole ,

Che botà sempe vole

Addò vota lo sole ; e cchisto sole

Site vuie ncarne ed ossa. Signorina ,

O vivo , o nfracetato int' a na fossa ,

Io v' appenno pe buto

Sto core che non è de taglia vascia ,

Ed aggiatelo vuie pe ricevuto ;

Pocca è ccore de vero fedelissimo

Marito , e ppo criato colennissimo.

Ro. Vommecca , bene mio , zuccaro e mmele.

Pe. Sì masto de cappella , che ve pare ?

Ca. Me pare ca si sa la medecina

Comme sa la rettoreca , io vorria

Ccà no butto de sango mo iettare ,

Pe ffarme da sso gioia mmedecare.

Ro. Si fa le ccure socce a li trascurze ,

Nce toccarrà bedere

Li malate chiavà de facce nterra

Pe dolore non cchiù , ma pe piacere.

Pe. A tte , criato ; azzecca chelle segge ;

E a mme chella perciata. Nicoletta ,

Chillo puosto tte spetta. Don Diaforio ,
 No figlio avite digno de la cetola
 D' Ommero , che cantaie Chilleto , e Alessa.
 D. S. Sibbè patre le sia , v' aggio da dicere
 Ch'è na pasta de mele , ed ogne ammico
 Ncantannose lo mann' a benedicere.
 Quant' è cchiù sodo , tanto
 Sarrà cchiù guappo miedeco. Guaglione ,
 Era vero pappone ; non parlava ,
 Nè a Commara-Setella maie iocava.
 Arrevato a nov' anne , a mmalappena
 Sapeva competà. Sia beneditto !
 Io decea ntra me stisso. Songo tutte
 L' arvole cchiù tardive
 Li meglio a portà frutte : ha cchiù durata
 No scritto fatto nfacce a no pepierno ,
 Che no dint' a l' arena. Lo mannaie
 A no colleggio ; ed isso consumanno
 Cchiù l' uoglio ca lo vino ,
 Sempe nnante tenea la Calapino.
 E ccomme quarche mpresa ,
 Riesce cchiù int' a n' ora , ca ncient' anne ,
 Pescaie sarrà dottore. A desputare
 Ne vo la meglio : è spina , anze sopruosso.
 De li miedece tutte : e mme garbizza
 Che ba appriess' a l' antiche ,

Comme cane a patrone; e ttanta ntriche
 De sesteme presiente,
 De malatie derette, 'e de nderette
 Che non baleno n' ette,
 Non bo manco sentire nnommenare.

D. I. Ve voglio, signorina, presentare
 Comm'a no rammaglietto,
 Sto scritto mio ndefesa
 De lo male de pietto.

Ni. E cche ne faccio?

Ro. Sacc'io che farne de sso scartafaccio:
 Nce aparo lo retretto, comme fanno
 Co le ccarte che beneno da Franza.

D. I. E a buie suocro futuro,
 Io ve mmito a bedè la sezione
 De no muorto appestato.

Ro. Chist'è mmito, non chille che se fanno
 Pe bballe, e ppe triato.

D. S. Io so sicuro
 Che figliemo sarrà iennero bravo,
 Buon patre de famiglia, e non pupazzo
 De stoppa pe spassà le creiature.

Pe. Tene vigliette e assaie da li signure?

D. S. Èmmeglio mmedecà schitto a lo prubbeco.
 Non daie cunto a nesciuno;
 Secota la corrente, e no staie mpene

Pe n niente, e cchello che ne vene vene.

Li signure non bonno maie sentire

Ca lo mare dà treglie, e dà fragaglie,

E cche la medecina, comm' afferra,

Mo te torna nsalute, e mmo t' atterra.

Ro. Bella chesta! Se credeno che banno

Li Don Diaforie pe ssanarle? vanno

P' avè la visitella,

E ffà ricette nzifra. Pe ttutt' auto,

Spetta a llo ro a bedè de stare buone,

O d' avisà la Congregazione.

D. S. Lo pevo surdo è cchi non bo sentire.

Pe. Don Fistolo, facite

Cantà no poco a ffigliama.

Ca.

So llesto.

Farrimmo no dovetto

De lo triato de lo Sangompietto.

Signorì, vecco ccà la parte vosta.

Ni. A mme?

Ca. (Vieneme appriesso, e llassa fare.

Io tengo poca voce, ed accompagno

Schitto la signorina.

Pe.

E qua è lo tema?

Ca. No craparo assettato steva nterra,

Quanno, sentenno no grà serra-serra,

Se votaie, e bedette no pacchiano,

Che se spassava a ddi male parole
 A na fegliola. Corre ; a cchillo chiochiaro
 No paccaro conzegna ;
 Torna da la fegliola, che cchiagneva ,
 E cchella lo rengrazia.
 Isso maie non se sazia
 De ddi che chello e nniente era tutt'uno.
 Se ne parte, ma mpietto
 Lo core suio non trova cchiù arrecietto.
 Stanno sempe nserrata la fegliola ,
 Maie non l' arriva a ddi meza parola.
 La cerca pe mmogliera ;
 E ntramente terzaia chesta primmera ,
 Appura e ntienne, e ssente
 Ca lo patre vo darla a no catammaro ,
 Piezzo de catapiezzo , che non tene
 Pile a la varva, qua cappotto vecchio.
 Le votano li canchere : se mpizza
 Sott' ato nomme ncchella casa, e trova
 Lo zito , ma futuro comm' *amavero*.
 Vole de retto trammete
 Darle la bon' annata, ma se tene
 Le mmano a scianco pe creianza ; e ddioe
 Ntuono d' alamirè, nchiave de basso ,
 E ntiempo quatto-trè cheste d' ammore
 Parole a cchella ch' isso tene ncore.

Non me fido cchiù penare :
 Menechè, tu m' aie da di,
 Si me spetta de campare,
 O m' attocca de morì.

Ni. Ntuono mio, lo matremmonio
 Io co ttico vorria fà ;
 E sso zito qua demmonio
 È benuto a mme zucà.

Pe. Figliama Nicoletta è no trasoro,
 Canta a lo mpronto comm' a na Fodoro.

Ca. Si cchest' anema d' ammore
 Pe tte spanteca, nennè,
 Che respunne?

Ni. Ca sto core
 Tippe tippe fa pe tte.

Ca. Che parole! Lo golio
 Io terria de le ssenti
 Reprecà.

Ni. Sto core mio
 Fa pe tte no tippe tì.

Ca. A lo munno io mo sarria
 Cchiù asciortato de li rri,
 Si sso zito, nenna mia,
 No mme stesse a nzallani.

Ni. Che cioncasse addò se trova,
Sibbè fosse mmiezo ccà,
E a cchi porta chessa nova
Io la nferta voglio dà.

Ca. Ma si t' obbreca lo gnore
Sso ciavattolo a sposà?

Ni. Menechella primmo more,
E sse nozzole po fa.

Pe. Lo patre niente dice a sse parole?

Ca. Niente ; sta zitto.

Pe. È n' aseno a doie sole.

Ca. Core bello...

Pe. Ed appila,
Ch' esce feccia fetente ! È sso craparo
No refila-cappotto : è Menechella
Na nennella , che mmereta
Le ffunecelle attuorno , comm' a strummolo.
Damme ssa carta , Nicolè... Mmalora !
Le pparole ch' aie dette no nce stanno ;
Veco schitto le note.

Ca. Mio signore,
Co la stampa a bapore mo se sole
Mpizzà dint' a le nnote le pparole.

Pe. E ba a fà trincie lanze a le ccantine,
Facce de vava mia , fatta a ppaletta !

Ca. Credea spassarve.

50

Pe. Ed io te mannarria
Nfrisco, comm'a mmiellone, Mmicaria.
Statte buono, monzù, chell' è la via.
Moglierema mo vene.

SCENA SETTEMA

*Donna Popa, Don Peppe, Nicoletta,
Don Diaforio S., Don Diaforio I. e Rosella.*

Pe. O Popa mia,
Te presento lozito Don Diaforio.

D. I. Dopp' avè dato già n' uocchio a lo pesce,
Dongo l' ato a la gatta....

Po. Io so benuta
A ttiempo pe bederve, e ddedecarve..:

D. I. Dongo l' ato a la gatta;
Ed a buie, socra mia, femmena... femmena...
Signora cara, avennome nterrutto
Lo periodo a lo mmeglio,
Non m' allecordero cchiù la razione.

D. S. Stipatella pe n' at' occasione.

Pe. Popa mia, si ccà stive
Na mez' oretta primino, oh che sentive!

Ro. Sentiveve decreto de consiglio,
Iennero, figlio, statole che sonano,

Sciurille, che se votano...

Pe. Coletta,
 Tiempo perduto non s'acquista maie;
 Prommitte de sposà sso dottor fiseco.

Ni. (Che pozza morì tiseco!) Vedite....

Pe. Ch'aggio a bedè, mazza vestuta mia?

Ni. Chi va chiano, va sano: io mo vorria
 Quarche mese a penzà si simmo nate
 L'uno pe l'auto.

D. I. Io l'aggio sistemato,
 Ca pe buie songo nato.

Ni. Ed a me pare
 Che bene nzembra non potimmo fare.

Pe. La carretta s'acconcia pe la via:
 Verrà la simpatia doppo sposate.

Ni. Ma lo zito non è no capezzale,
 Che si no mme garbizza, pozzo farne
 Sfilacce, pe mmannarle a lo spetale.
 E Don Diaforio, essenno galantommo,
 (Che pare no facciommo) non bo certo
 Na mogliera pe fforza.

D. I. *Nego, nego*
Consequentiam. Pozz'esse galantommo,
 E sposarve, si vo lo gnore vuosto.

Ni. (Che faccetuosto!) E cchess'è la maniera
 De ppiglià la mogliera?

D. I.

Signorina ,

L'antiche nce decevano.....

Ni. Muorte co muorte , e bive co li vive.

Mo se dice da tutte

» Si l'erva che non boglio a l'uorto nasce ,

La scippo , e ghietto abbascio » Essi m'ammate ,

Avit' a ffà zo che dich'io.

*D. I.**Declaro :*

Sarvanno li nteresse de sto core.

Ni. E sso core si m'amma , ha da obbedire.*D. I. Distinguo.* Nchello che n'affenne ammore ,*Concedo ;* nchello che l'affenne *nego.**Ro.* (Puozz' annegarte a mmare !) Vuie volite

Signorina mia bella , attaccà lite

Co no dottore ? Io ve derria che a buolo

Combinasseve mo lo *biş c bola.**Po.* Non borria che tenesse

Madamosella quarche verme ncapo.

Ni. Non è verme gnernò , ma vermeciello

De pasta de la Costa , senza mbroglie.

Pe. Io ccà faccio lo cjuccio ntra li suone.*Po.* Peppe mio , s'io portasse la battuta ,

Sacc'io che strata le farria pigliare.

Ni. Lo ssaccio ; ma non sempe ssi consiglie

Songo ntise da chelle ,

Che ffigliaste se trovano , e non figlie.

Po. O so figlie , o figliaste,
Non hanno co lo patre a ffà contraste.

Ni. Ma se ponno defenne co rispetto ,
Contanno le raggiune...

Po. E cchella toia
Sa qual'è? che borrisse mmaretarte
A sfizio tuio.

Ni. Si tata non bo darne
Lo zito ch' io vorria , me lassa mpace,
Nè me conzegna a cchillo
Che pare no tentillo.

Pe. Perdonate ,
Signure Don Diaforie ,
Chisse contradettorie.

Ni. Ogne zetella
Tene qua fine quanno sposa. Io voglio
No marito p' ammarlo , ma de core ,
E ccoserme cod isso a ffilo duppio
Nfi che bene la morte ;
Nce aggio donc'a ppenzare , e a ppenzà forte.
Saccio che certe mmaretà se vonno ,
Pe llevarse da cuollo-li pariente ,
E ffà chello che ponno , e cche non ponno
Co mode , co triate , e cco banchiette :
Saccio cert' ate ttale ,
(Donna Popa , parlanno ngenerale)

Che sposano p'avè li donative
 Da li marite, che so' ancora vive ;
 E borriano atterrarne uno pe mmese,
 Pe ffarse meglio spese. È natorale ,
 Ca pe sse muccoselle
 Tutte l'uommene songo e buone, e belle.

Po. Nicolè, tu te spieghe
 Comm' a libbro stracciato: parla chiaro,
 Che ntienne?

Ni. Chello ch' aggio ditto, ditto;
 Ch' aggio a dicere cchiù, fecato fritto?

Po. Figlia, tiene na lengua,
 Che spercia comm' a ssuglia;

Ni. Me sto zitta.

Po. Che scippa qua ttenaglia;

Ni. Ed io scemeo.

Po. Che qua fruoffece taglia;

Ni. Punto mmocca.

Po. Che ntacca qua rrasulo.

Ni. Vuie lo decite sulo, azzò responna,
 Pe trovarme da sotto. Ed io mo piglio
 La scusa de lo malo pavatore;
 Ve faccio no saluto, ed esco fore.

SCENA OTTAVA

*Don Peppe, Donna Popa, D. Diaforio S.
Don Diaforio I., e Rosella.*

Pe. Sì, vattenne, ma o mange ssa menesta,
O iettate, Colè, da ssa fenesta :
O spuse a D. Diaforio,
O vaie a refetterio, e a dormetorio.
Popa mia, t'accone' io la signorina,
Che tene tutte quante le bertute
De la rosamarina.

Po. Peppe mio caro, quanto vaco, e ttorno :
Aggio da ì pe fforza pe n'affare,
Nè nce pozzo pe mme n'autro mannare.

Pe. Po va da lo notaro, e ffà spicciare
Chelle ccarte che ssaie.

Po. Peppuccio mio,
Penza a stà alliegro sa ?

Pe. Popè, bonnio.

SCENA NONA

*D. Peppe, D. Diaforio S. D. Diaforio I.,
e Rosella.*

Pe. Mogliera d'oro mia, mogliera bella!

D. S. Nuia nce ne iammo a ffà qua bisitella.

Pe. Iate co l'anno buono: non ve sia

Pe ccommanno, asservateme lo puzo.

D. S. Figlio, tatea lo manco,

Ch'io tasteo lo deritto. *Tu quid dicis?*

D. I. *Mala tempora currunt*: chisso puzo

Ne mme garbizza.

D. S. *Bene.*

D. I. È ttesatiello, pe non di tesato

Comm'a na corda de violino.

D. S. *Bene,*

Atque bene.

D. I. Trammea; fa zeza.

D. S. *Et optime.*

D. I. Vo mmenaccià la spreneca parenchema,

Zoè la meuza.

D. S. *Fili mi, doctissime!*

Pe. Ma Don Arazio ha ditto

Ca lo fecato è sfritto.

D. S. *Hic, et haec homo*

È la femmena , l' ommo , e ccose neotre.

La parenchema piglia

Meuza , premmone , fecato , e rrognone.

V' ordena Don Arazio la piatanza

D' arrusto iuorno e ssera a crepapanza ?

Pe. Schitto bollito.

D. S. E ssempe simmo a cchello.

L' arrusto , lo bollito , e lo stufato

So ffiglie d' uno ventre.

Pe. Sto speruto

De sapè dint' a n' uovo

Quant' acene de sale pozzo mettere.

D. S. Quatto , seie , otto , dece , sempe pare ,

Pocca tutte li spare

So de la medecina.

Pe. Vedite de tornà pescraie matina.

SCENA DECIMA

D. Peppe, e D. Popa.

Po. Primmo d' ascì tte dongo na notizia,
E ffora me ne chiammo. Ngallaria
Aggio visto no giovene parlanno
Co Coletta, e bedennome è foiuto.

Pe. Te rengrazio, Popè: sì accorta, e ttiene
Cient' e quatt' uocchie comm' a grattacaso.

Po. Rita steva co lloro, e scemiava.
Potrisse addimmannarle...

Pe. Mannamella.
Nicolè, mara tene: aggio appurato
Lo costrutto de l' uoglio mmertecato.

D. Peppe, e Rita.

Ri. Papà, vuie me volite?

Pe. Vienetenne,

Ch' avimm'a ffare cierte cuntarielle.

Guardame nfacce : m' aie a ddì qua ccosa?

Ri. Ve dico, si volite,

Lo cunto de la Fata, o de le Zite,

Na favola d' Asopo.

Pe. N' ata cosa.

Ri. Qua cosa?

Pe. Tu la saie meglio de mene.

Ri. No ssaccio niente.

Pe. Niente?

Ri. Proprio niente.

Pe. Tu tiene ancora a mmente

L' ordine mio, che chello che bedive,

Fusse venuta a dirmelo?

Ri. Gnorsine.

Pe. E nniente aie visto dint' a sta iornata?

Ri. Gnernò.

Pe. Gnernò addavero?

Ri. Addavero.

Pe. Mo piglio lo cignone.

60

Ri. Papà mio!

Pe. Non mme dice ca no giovane
Aie visto ngallaria co Nicoletta?

Ri. Papà bello!

Pe. T'acconcio pe le ffeeste.

Ri. Papà mio, perdonateme! Coletta
Non bolea ch'io parlasse de ssa cosa.
Ma mo ve conto tutto filo filo.

Pe. Pigliete mprimmo ecà na cignonata
Pe la boscia mpacchiata; e ppo parlammo
De lo riesto.

Ri. Lassate lo cignone.

Pe. Te, ncignalo pe mmo ncopp'a le spalle.

Ri. (Mo nce trovo remmedio.) Chi m'aiuta!
Vuie m'avite feruta: io mo sconocchio.

Pe. Oh ch'aggio fatto! Rita bella! Figlia
De-sto core! Benaggia li cafune,
Che benneno cignune! Rita mia!

Ri. Non chiagnite! Io so morta, arrassosia,
Meza, e non tutta.

Pe. Frabbottella, voglio
Perdonarte, co patto
Che tale quale aie da contà lo fatto.

Ri. Gnorsi, papà.

Pe. Ma statte allerta. Io tengo
Sto dito peccerillo, che mm'avvisa

Si dice pane pane, e bino vino.

Ri. Ma po non lo decite a Nicoletta.

Pe. Non dubbetare.

Ri. Io steva ngallaria
Co la pupazza mia, quann'è trasuto
No galántommo.

Pe. Appriesso.

Ri. Io l'aggio addimmannato chi voleva,
E mm' ha respuosto ch'eva
Lo masto de cappella.

Pe. (Ammico Cesare,
T'aggio ntiso.) Dì appriesso.

Ri. Nicoletta
Vedennolo, l'ha ditto: vavattenne,
Ch'io sto ncopp'a no taglio de cortiello.

Pe. E cchillo?

Ri. Ha fatte recchie de mercante.

Pe. E ha ditto niente?

Ri. Ha ditto
Che sempe le sbatteva l'uocchio ritto,
Vero nsignale de no core affritto.

Pe. Che cchiù?

Ri. Ch'essa era bella,
E bella zita nchiazza se mmarita.

Pe. Nient'auto?

Ri. Che da vuie mannava subbeto,

P'averla pe mmogliera.

Pe.

E doppo?

Ri.

E doppo

È passata la gnora , isso l' ha vista ,
Nce ha chiantate de botta nnisso nfatto ,
Ed ha scese le scale a quatto a quatto.

Pe. È ffenuto?

Ri.

Gnorsi.

Pe.

Ma lo detillo

M'avvisa ca cchiù robba avrisse a dicere.

Ri. No lo credite ; è ddito bosciardiello.

Pe. Credo a tte?

Ri.

Signorsi , a pparola mia.

Pe. Fenimmo chesta vernia. Va pazzea

Co la pupazza. Oh maro me ! nce steva
Ss'ato guaione ncampo.

No ssaccio comme campo : sto abbeluto:

Seggia perciata mia , tu damme aiuto !

SCENA DUDECESEMA

*D. Nufrio, e Dditto.**Nu.* Pè, ched'è? comme staie?*Pe.* Cchiù da chill' ato munno che da chisto.*Nu.* E ccomme?*Pe.* Non me fido de parlare.*Nu.* So benuto a proporte no partito.

Pe figliata, e nnepotema Coletta.

Pe. Cchiù no mme nnommenà chella fraschetta,

Pescraie la metto nmonasterio.

Nu. Tiene

Sso connutto de voce, e staie malato?

Po assodammo st' affare. Ma ntramente

T'aggio portato ccà no sartinbanco,

E l'aggio situato ngallaria.

Chillo decenno stroppole e cchiù stroppole,

Tutte rirere fa, ma pe lo scianco.

Nuie, che simmo fratielle,

Mo facimmo *auniantur* pignatielle;

A ccure a ccure nce assettammo, e cchillo

Nce saprà recreià lo spiretillo:

E cco na risa a schiattariello sazio

Volimmo fà no cuorno a Don Arazio.

Scompetura de lo Secunn' Atto.

ATTO TERZO**SCENA PRIMMA**

D. Nufrio, D. Peppe, e Rosella.

Nu. Te spassaste, fratiè, co ttanta mpocchie
De chillo sartinbanco?

Ro. Ate che cchelle
De miedece, e geruggeche, che songo
Chiatte, tonne, e ccallose comm'a rrape.

Nu. Parlammo nserio mo...

Pe. Cinco minutole
Aspettame, e sto ccà.

Ro. Iate a trovare
Chillo Don Tale Annettate-ch' aie-fatto.

Pe. Spiccia, Rosella; lo bastone damme.

Ro. Li malatè camminano a tre ggamme.

SCENA SECONNA

*D. Nufrio, e Rosella.**Ro.* Signò, penzate a la nepote vosta.*Nu.* Mme fa proprio piatà.*Ro.* Ma pe llevare

Da capo a lo signore chesse nnozzole

De Don Diaforio miedeco apposticcio,

Ma vero Don Nicola Pacchesicco,

Nce vorria quarche miedeco, che pozza

Metterle Don Arazio ntrattacore.

Ma sto miedeco lesto addò se pesca?

Mo nce arremmedio io.

Nu. E ccomme faie?*Ro.* Mo faccio bona va, sì bona vene,

E ppo ne nasca n'urzo.....

Lo signore : fenimmo sta trascurzo.

SCENA TERZA

D. Peppe, e D. Nufrio.

Nu. Pè , ment'io chiacchiareo ,
Non te nzorfà.

Pe. Gnernò.

Nu. M' aie a responne
Co docezza.

Pe. Gnorsì.

Nu. Senza maie fare
Tira e mmolla.

Pe. Gnernò. Che asordio luongo!

Nu. Tu staie commodo, tiene
Schitto doie figlie; e, ssotto
Correzzione toia, pecchè vuoie mettere
Coletta nmonasterio?

Pe. Pecchè so patre, e dintò a cchesta casa
Io commanno le ffeste.

Nu. Donna Popa
Pe cchella bella caretà pelosa
Speresce de vederle monacelle.

Pe. Moglierema carosa sempe arrobbha
Le spoglie de lo mpiso.

Nu. Non sia maie!
Chella vo tanto bene a le figliaste;

E ppe , te si *opus sitte* ,
 Se iettarria porzì da ccopp' a n' astreco ,
 (Si nc'è scala mperò.) Ma pe qua fine
 Vuoie conzegnà no miedeco a Coletta ?

Pe. Sso iennero è a proposeto pe mmene.

Nu. Ma non già pe Coletta , che mo tene
 No partito cchiù meglio.

Pe. Lo cchiù meglio
 È pe mme chi dich' io.

Nu. Lo matremmonio
 Lo fa figliata , o tu ?

Pe. Ma pe parente
 Voglio chi m'abbesogna.

Nu. Nchisto muodo ,
 Si l' ata figlia toia
 Fosse cchiù strappatella , mmaretà
 S' avria co quarche spezeiale.

Pe. E già.

Nu. E buoie stà sempe attorniato , sempe
 Da spezeiale , e mmiedece , ntramente
 Puoie vennere salute ?

Pe. Che ne vutte ?

Nu. Ne vottarria li visce tuoie. Se tratta
 Che manco si crepato
 Co tanta bobbe , e nchiaste ch' aie mmoccato.

Pe. Stì nchiaste , e ccheeste bobbe so pe mmene

L' ancora de speranza. E ssi le llasso

Pe tre ghiuorne so fritto ;

E cchesto Don Arazio mine l' ha ditto.

Nu. E non t' ha ditto ca te vo mannare

Li surece a ngrassare ?

Pe.

Cride a mmiedece ?

Nu. Lloco te voglio , Cicco , a sta sagliuta.

Quante e quante non sanno si so bive ,

E credono allongarce lo ccampare.

Pe. Ma chessa professione ha biento mpoppa

Da che lo munno è mmunno.

Nu.

E ssemp'è scura.

Pe. Lloro nce hanno a guarì.

Na.

Co li sisteme

Che cacciano ogne ghiuorno.

Pe. Donca a ssentenzia toia sanno no cuorno ?

Nu. Sanno parlà latino , sanno ddicere

Ngrieco le mmalatie , sanno abbottarte

De parole de viento ,

E promesse de sera ; ma che ponno

Farte stà buono , chisto po è no suonno.

Pe. Ma co la pelle lloro

Puro fanno lo stisso , e zo se vede.

Nu. E Don Arazio co ssa bona fede

Atterraria lo munno. E a sto proposeto

Moliero a na commeddia

Attacca no locigno d'otto canne,
E mmaie non la fenesce.

Pe. E ttu pretienne

Saperne cchiù de chille,
Che macellano muorte a li spetale?

Nu. Compatesco li miedece ; ma dico
Ca nmedecina stammo.

Ancora a *Be-a-bà*, nè competammo.

Pe. Pocca puro li pullece

Mo teneno la tosse , e ttu vuoie mettere
Vocca a sse ccose , è mmeglio de cagnare
Trascurzo ; ca si no, torno a stà peggio.

Nu. Sì ; cagnammo trascurzo. Pecchè figliata
Non bo lo zito a ggusto tuo, vuoie metterla
Nmonasterio? Fratiello,

Puozze campà cient'anne , ed io dociento ,
Tu lo faciste a ggenio tuo doie vote?

E cchella lo bo fà na meza vota
Proprio comme le nfroceca lo core.

Tu sì scorza de chiuppo , o tatagnore?

SCENA QUARTA

D. Matteo co no serviziale mmano , e Dditte.

Pe. Nufrio mio , co llecenza.

Nu. Che tte manca?

Pe. Na mano lava l' auta ; ed è benuto

Don Matteo pe llavarme lo stentino.

Nu. Donca isso puro è no stentino. E ccomme ?

Aie sempe da pigliare botta botta

Mo na bobba pe ccoppa , e mmo pe ssotta ?

Piglia sciato no poco.

Pe. Don Matteo,

Vedimmonce stasera , o craie matina.

Mi. E cche mo , e cche po , che oie , che craie ,

Che pescraie , che pescrigno , e cche pescruozzo ?

E buie , Don Nufrio mio , mettite vocca

A mmedecine , e a llavative ? Zitto ,

E llassate fà l' arte a chi sa farla !

Nu. Se vede ca sì soletto

De parlare a le spalle , e no a la facce ,

Servezialista de ste brache.

Mi. E ppozzo

Perdere tiempo ? Io so benuto apposta ,

Paganno cinco rana dint' a l' *Omnibus* ,

Mannato ccà da Don Arazio ; e ad isso

71

Contarraggio lo tutto, e cchisso mpiedeco,
Che non m'ha fatto fà l'affizio mio.
Sì Don Pè, Si Don Nù, mo v' acconc' io.

SCENA QUINTA

D. Peppe, e D. Nufrio.

Pe. Nufrio mio, mo pe tte starraggio buono
Co lo figlio de Nufrio.

Nu. È no gra guaio
Non farse mo pe mmo no lavativo,
Ordenato da chi? da Don Arazio?
È pe mme na schiattiglia,
Penzare buono, e non potè fà niente.
Le mmalatie che tiene so li miedece.

Pe. Ma tu parle accossì, pecchè staie buono:
Io che sto, bene mio, pe ghi a lo storno,
Si già no nce so ghiuto,
Strillo soccurzo, e mmaie non trovo aiuto.

Nu. Tu che suoffre?

Pe. Non puozze mai provarlo,
Pe non portarne lacere li panne;
E vedarrisse mprova qua mellone,
Che l'aosà, e traosà so duie malanne.....
Mmalora! Don Arazio.

SCENA SESTA

D. Arazio , Rosella , e Dditte.

Ar. Aggio ntiso mo abbascio a lo portone

Ca le ricette meie so ccoffeiate.

Pe. Don Arà...

Ar. No malato se rebella

Contr' a cchi pò sarvarlo ?

Ro. Oh cchesta è bella !

Ar. No lavativo fatto da ste mmano ?

Pe. Non so stat'io...

Ar. Mmentato da sta capo ?

Ro. Aie ditto niente !

Ar. E cche balea pe mille ?

Pe. Nufrio...

Ar. Sso lavativo non se cura ?

Pe. Fratemo...

Br. Chest' azione

È de no crapettaro.

Ro. È de no boia.

Ar. Contro la medecina...

Pe. Nufrio, fraterno...

Ar. De lesa-facortà ddellitto...

Ro. E mmiezo.

Ar. A Lucca mo me parze de vederve.

Ro. Beneditto !

Ar. Chest' era la scrittura

Nfavore de nepotemo, e la straccio.

Pe. Fratemo corpa a ttutto.

Ar. Coffeiare

No lavativo mio ?

Pe. Mo me lo piglio.

Ar. Già starrisseve buono.

Ro. Pco ped isso.

Ar. Addò starriano cchiù l'ommure guaste ?

Pe. Frate mio, te rengrazio.

Ar. N'ate dudece

Medecine, e arrevaveve a Baiano.

Ro. Se lo mmereta.

Ar. Pocca non avite

Voluto a mme sentire :

Pe. Io no nce corpo.

Ar. Pocca avite a mme fatto sto trainiello :

Ro. Mo sconta vecchìo, e nnuovo.

Ar. Pocca site

Capotuosto ;

Pe. Gnernò !

Ar. Da mo ve lasso

A la bile ch' avite int' a lo stommeco ,

A lo sango ch'è niro, e sbocca a vuommeco ,

All' ossa che sò peo de sarcenelle ,

E cchiù rosecarelle de l' antrite....

74

Ro. Schiattamuorte e ppezziante, a buie, corrite.

Pe. Io me chiagno pe mmuorto.

Ar. A summo a summo,
Chest'è causa de chiappo ntra no mese.

Pe. Già me lo sento scenne pe li rine.

Ar. Mprimmo s'affacciarà na frevicella,

Ro. (A tte decenno.)

Pe. Don Arazio mio !....

Ar. Che lo curzo farrà de quartanella:

Ro. (A Don Diaforio tuio.)

Pe. Ma, Don Arazio....

Ar. Po stregnenno le ddoglie, è tterzanella:

Ro. (A cchi te crede.)

Pe. Don Arazio caro...

Ar. S'apreno qua cconnutto le bodella:

Ro. (A cchi te pava.)

Pe. Don Arazio bello...

Ar. E s'apara accossì la castellana.

Ro. (Pe ttutta la streppegha Araziana.)

SCENA SETTEMA

D. Peppe, e Don Nufrio.

Pe. Frate mio, la paura

M'ha chino lo cazione.

Nu. Tu si pazzo?

Pe. M'addono de lo fiato de lo miccio :

So già spedito.

Nu. Eh llevate da capo

Ca nc'è mal' aria a Baia ! Tu staie buono.

Pe. Aie ntiso, o no che ha ditto Don Arazio ?

Nu. Ma le cchiacchiere soie, fratiè, non hanno

Co la salute toia niente da spartere.

Bell'ommo è Don Arazio, che dispaccia

De presente, pretereto, e ffuturo !

Chella collera soia

Pò farte tanto male, quanto bene

T'hanno fatto le bobbe che t'ha date.

O manna, frate mio,

A benedì li miedece, o ne chiamma

N' ato, che mmedecanno scorza scorza,

Non te fa à co la salute ad orza.

Pe. Nufrio mio, chillo schitto

Sape lo mmale mio.

Nu. Lo male, che non tiene ? Sa che sape ?

Chille che tiene tu belle felusse,

E ssape cchille ianche e cchille russe.

SCENA OTTAVA

Rosella, e Dditte.

Ro. Signò , nce sta no miedeco ,
Che ve vo fà na viseta.

Pe. Che dice ?

Qua miedeco ?

Ro. No miedeco de cchille

Che scriveno recette.

Pe. E ssaie lo nomme ?

Ro. Se lo sap'isso : chello che sacc' io

È che mme rassommeglia ,

E pparimmo de ciucce na pareglia.

Pe. Fallo trasi.

SCENA NONA

D. Nufrio , e D. Peppe.

Nu. Li miedece

Vera mal' erva so , che sempre cresce ;

Uno ne trase , mente n' auto n' esce.

Pe. Tu sarraie caosa de la morte mia.

Nu. Vuoie fà sempe no ricpeto ?

Pe. Me sento

Ncopp' a lo cuollo , pevo de lo boia ,

L' agurio che m' ha fatto Don Arazio ,
E l' ha fatto pecchè? pe corpa toia .

SCENA DECEMA

Rosella vestuta da miedeco, e Dditte.

Ro. A buie Don... A buie Don... A mme non preme
Lo nomme vuosto ; io penzo a la salute :
E sso benuto ccà pe v' ordenare
Cchiù purghe, e cchiù nzagnie, che non avite
Capille ncapo.

Pe. Io ve rengrazio. (Oh bella !
Sso miedeco, fratiè , pare Rosella.)

Ro. Perdonate, ch'io vaco, e ttorno subbeto ;
Pocca me so scordato
De dare a lo criato
N' ordine de recetta ,
P' arrecettà chi spetta. Io mo ccà traso.

SCENA UNNECEMA

D. Peppe, e D. Nufrio.

Pe. Senz'acchiaie a lo naso
 Li cecate de Bare
 Pure derriano ch'è Rosella.

Nu. Pareno
 Proprio doie sghizze d' acqua; ma decea
 Pulifemo chill' uorco:
 Tutto soccede a cchisso munno puorco:
 E de ss' asempie è cchino
 Lo libro de Pasquino
Pe. È no stopore.

SCENA DUDECESEMA

Rosella, e Dditte.

Ro. Vuie m'avite cchiammata?
Pe. Nossignore.
Ro. Decistev Rosè?
Pe. Maie tale cosa.
Ro. Sarrà stato no sisco int'a le rrecchie.
Pe. Pocca te truove ccà, vide lo miedeco
 Ch'è tale quale a tte.

SCENA DECIMAQUARTA

Rosella vestuta da miedeco, e Ditte.

Ro. Pe ccaretà scusateme,
Si v'aggio fatto fà lo cuollo luongo
P'aspettarme.

Pe. (Fratìè, tu che ne dice?)

Ro. So benuto a bederve, avenno ntiso
Ca vuie state malato nsempetierno
D'autunno, state, primmavera, e bierno,
Ed avite pe cchesto nnommenata
Pe la Lecca, e la Mecca.

Pe. Ve rengrazio.

Ro. Vuie me guardate fittu fittu nfacce?
Mme saprisseve a ddì quant'anne tengo?

Pe. Che ssaccio? o poco manco, o poco cchiù
De vinticinco, o vintiscie.

Ro. Puh puh!
Sto a novanta sonate.

Pe. Che? a novanta?

Ro. Chesto ve fa a bedè si saccio l'arte:
A novant'anne paro no cardillo.

Pe. Senza na rappa, o ianco no capillo?

Ro. Io so miedeco zincaro: cammino
Regne, cetà, casale, e mmassarie,

Pe trovà malatie le cchiù neurabbele.
 Che ne faie de no reuma,
 De na postcoma fredda, e de na tossa?
 Vaco trovanono canchere a la meoza,
 Freve malegne, vierme soletarie,
 Accesse ncapo, ancine ncanna, ezzetera.
 Io tanno ngrasso, tanno scialo, e rrido:
 E mo vorria che avisseve
 Tutte sse malatie ch'aggio contate,
 E ffusseve arredutto a l'angonia,
 Pe ppoterve servì de tutto core.

Pe. Io ve rest' obbreccato de st' annore.

Ro. Va, dateme lo puzo: puzo brutto,
 Puzo frabbutto! avrisse a ffà co mmico!
 Chi vene a mmedecarve?

Pe. Don Arazio.

Ro. Don Arazio? Sso nomme no sta scritto
 Dint' a lo libro-de-mammoria mio.
 Fosse qua manescarco? E cche ve dice?

Pe. Mme dice che patesco
 A lo fecato; ed altre m'hanno ditto
 A la meoza.

Ro. So ccose pe zoffritto.
 Lo male è a lo premmone.

Pe. A lo premmone?

Ro. Gnorsì. Che ve sentite?

Dolure ncapo.

Ro. E cchiss'è lo premmone.

Pe. Mme s'abbaglia la vista.

Ro. A tte, premmone.

Pe. Mme pizzeca lo core.

Ro. È lo premmone.

Pe. Me sento stracquo.

Ro. Cosa de premmone.

Pe. Da lo scianco mancino a lo tallone

Soglio cioncà.

Ro. Se spassa lo premmone.

Ma quanno state ntavola,

Magnate co appetito?

Pe. Sissignore.

Ro. Lo premmone. Rompите a mmaraveglia

Spisso quarche botteglia?

Pe. Sissignore.

Ro. Lo premmone. No suonno de nov' ore

Ve lo facite doppo?

Pe. Sissignore.

Ro. Ah premmone, premmone,

Che staie sbattuto 'cchiù de no tremmone!

Sso Don Arazio che ve dà a mmagnare?

Pe. Erbette fine.

Ro. Comm' a ppecoriello.

Pe. Patate cotte.

Ro. A muodo de porciello.

Pe. Vruodo d'ossa.

Ro. Da vero cacciottiello.

Pe. Vino adacquato, e ppappa.

Ro. Pe l'auciello.

Don Arazio, e no ciuccio fanno bene

Qua raspa e llimma, l'ummeto e pperimma.

Venimmoncenne a nuie. Pigliate sempe

La lacrema de Somma,

Caso vicchio de Puglia,

Vitella de Sorriento, ostreche belle

De lo Fusaro, provole affummate,

Sopressate de Nola, e sic de singolo.

Mmoccannove ssi pinnole gommuse

Comm'a ccolla de pasta,

L'arma s' azzecca ncuorpo, e non se scrasta.

Ve mann'io ccà no pratteco capace,

E mme nce affaccio io po da vota a bota.

Pe. Facite proprio n' opera devota.

Ro. Sso vraccio a cche ve serve?

Pe. Qua?

Ro. Lo manco.

Io da l'ascella lo farria tagliare.

Pe. Ma pecchè?

Ro. Da lo core, qua sanguetta,

Tutto lo meglio sango s'arrecetta.

Pe. Ma lo vraccio mme serve a ccient'affizie.

Ro. E cchill' uocchio dritto

Ve lo facite fritto? No ferruccio

Lo fa schiattà, nfocato no tantillo.

Pe. Io song'ommo, Monzù, non so froncillo.

Ro. Se piglia la sostanza de l'at' uocchio;

E ssi mo nnant'a mme ve lo cacciate,

Co lo manco cchiù mmeglio nce smicciate.

Pe. Iate troppo de pressa.

Ro. Anemo e ccore.

Pe. Che core, e ccoratella!

Ro. Io me ne vaco,

Pocc'a no gra consurto so aspettato,

Pe no Duca già muorto, ed atterrato.

Pe. Sso consurto se fa dint'a la fossa?

Ro. Ncasa de li pariente, pe bedere

Qua mmedccina se l'aveva a ddare,

Pe ppoterlo sanare. Ve so schiavo.

Pe. Saccio l'obbreco mio; ma sto mmalato;

Ed a buie poco mporta,

S'io mo non v'accompagno nfi a la porta.

SCENA DECEMAQUINTA

*D. Peppe, e D. Nufrio.**Nu.* Chiss'è no protomiedeco mperzona.*Pe.* Sì, ma spacca sentenze de diavolo.*Nu.* Ma miedeco non è,

Che dice, damme damme, e non tè tè.

Pe. M'aggio a ttaglià no vraccio, pecchè mpiccia?

M'aggio n'uocchio a ccaccià, pe bedè meglio?

Lo guadagno farria de Maria Vrenna.

Comme mme lo deceva tiso tiso!

Tridece co lo gallo, foss' acciso!

SCENA DECEMASESTA

*Rosella fengenno de parlà a quarcuno,
e Dditte.**Ro.* Eh ghiatevenne! Io sto comm'a na torca,

Nè da ssa mano sporca,

Che macella la ggente a lo spetale,

Io farraggio toccà lo puзо mio.

Pe. Tu chè mmalora dice?*Ro.* Lo ssacc'io.

Lo miedeco frostiero mme voleva

Toccà lo puzo, e ffarme na ricetta;

Ed io co cchiste zuoccole

Le volea fà passà vruoccole, e gnuoccole.

Nu. Peppe mio, mo che ha fatto Don Arazio

Co ttico *scocchia ccà*, vorria proporte

L'ato partito pe Coletta.

Pe.

Niente:

Monasterio me cchiammo. Io sto nsospietto

Che fa l'ammore, e ssaccio zitto zitto

Cierte trascurze ngallaria.

Nu.

Ma siente.

Sia dato, e non conciesso,

Ca se vo mmaretà, fa qua ddellitto?

Pe. Monasterio me cchiammo; e ssò doie vote.

Nu. Pe ddà gusto....

Pe.

A moglierema? Carosa

Chi tene mala nnommenata!

Nu.

Io parlo

Iusto, gnorsì, de Donna Popa; e cchella

Te porta pe lo naso comm' a bufara:

E ttu, chiochiavo vero qua marito,

E ppazzo qua malato,

Passe proprio pe n'aseno mmardato.

Ro. E buie mettite vocca a la signora?

Chest'è troppo, mmalora! a cchella femmena,

Che mmiente rose semmena

Pe le ffigliaste soie, raccoglie spine ?

A na mogliera, mo nce vo....

Pe. Tu saie ,

Rosè, si Donna Popa m'amma assaie.

Ro. Ma quanto! (quantol'uoecchio amma lo fummo.)

Pe. Si penza semp'a mme.

Ro. Ma fitto fitto.

(Quant'io penzo ad Ali che sta Nnaggitto.)

Pe. Si m'assiste de core.

Ro. Proprio de core. (Schitto pe nteresse.)

Don Nufrio mio, mo faccio confessarve

Senza corda ss'affare , si permette

Lo patrone.

Pe. Ma comme ?

Ro. La signora

Sta pe ttornà. Vuie ncopp' a lo seggione

Mo fengiteve muorto ; e ssentarrite

Strille, cchiante , campiseme , e trommiente

De la patrona mia , quanno lo ssente.

Pe. Provammo.

Ro. Ma imperò non la portate

Tropp' a llungo la cosa. Donna Popa

A no dolore tale

Potria chiavà de facce nterra ; e ttanno

È pevo lo remmedio , ca lo male.

Pe. E llassate servì ! lassa fà a Cola !

Ro. Ma Don Nufrio s' avria
A nnasconne ntramente
Da reto a cchella porta, e a ttenemente.

SCENA DEGEMASETTEMA

D. Peppe, e Rosella.

Pe. Rosella mia, no nc'è paura niente
A ffengere lo muorto?

Ro. Pe cchesto non nce cantano pezziente,
Nè bene schiattamuorto.
Volimmo fa vedere a lo fratiello,
Si Donna Popa vosta
È d' acito, o de zuccaro composta.

SCENA DECEMOTTAVA

*D. Popa , e Dditte.**Ro.* Bene mio , comm'è stato , bene mio !

Quant'era buono ne , quant'era buono !

Po. Rosè , ched'è ?*Ro.* Signora mia , signora !*Po.* Ch'è stato ?*Ro.* È mmuorto lo patrone , è mmuorto !*Po.* Don Pe....*Ro.* Don Peppe , signorsì , Don Peppe !*Po.* Ed è certo ?*Ro.* Ed è certo , e cchiù che certo !

Me so trovata sola , uh uh , so... sola :

A sto vraccio , uh uh uh , sto vraccio mio

Appoiannose , uh , tiseco è restato ;

E beditelo , uh uh , che sta assettato.

Po. Beneditto lo cielo ! Io mo resciao ,

Comm' uno che ha la razia de la vita.

Rosella mia , sì scema : pe ssa morte

Te vuoie l'anema fragnere ?

Ro. Io me credeva che s'aveya a cchiagnere.*Po.* Leva mano a sso piccio !

Chi s'è perzo ? no canchero mpasticcio ,

Che n'era buono manco p'esse acciso ;

No schifuso, seccante de la vita,
 Pazzo pe bobbe, e llavative: sempe
 Tabbaccone, muccuso,
 Co ttutte ncorreggibbele, e nfernuso
 Co na voce de truono.

Che fosse scortecato muorto e buono!

Ro. Chiss'è no panaggiereco appuntino,
 Che a Romma non farria manco Pasquino.

Po. Rosè, vieneme appriesso,
 E ccà stongh'io pe tte. Pocca nesciuno
 Sape ancora sta morte, zitto zitto
 Iammolo a mmette nuie ncopp'a lo lietto;
 E ssistemammo certe coserelle.

Le ccambiale, e ddenare

Me li boglio acchiappà comm' a ssalario,

P'avè passate accossì cane l'anne

Rente a sso varvaianne. Mo le levo

Tutte le cchiave che nsaccoccia tene....

Pe. Chiano chiano; non fà tira ca vene.

Po. Carosa me!

Pe. Signora Donna Popa,
 Teniveve ssa lopa?

Ro. Io mo me ioco

Muorto resuscetato,

Quarantasette, primm' aletto.

Pe. Fuie,

Fuie , mogliera de st' arma ! Lo mellone
 A ccocozza s'è rutto : li gattille
 Hann' apierto già ll' uocchie :
 E ssi a la robba mia tiene speranza ,
 Puoie scialare addavero a crepapanza.

SCENA DECEMANONA

D. Nufrio , D. Peppe , e Rosella.

Nu. Io me consolo , Peppe mio ; prositte.

Ro. Sto fore de li panne : chi credeva

Ssi latine a ccavallo de sentire ?...

Vene la signorina : io ve derria

Metterve n'ata vota a la supina

Comm'a no muorto , pe scovrì paiese.

Vedimmo si la figlia se spassasse

Pur'essa a ffà tre asse.

Don Nufrio nnascunniteve : mo vene.

SCENA VEGESIMA

*Nicoletta , e Dditte.**Ro.* Maramene carosa , maramene !*Ni.* Zitto , Rosella mia , ch' io mo me spireto.*Ro.* De spireto se tratta , sì , de spireto !*Ni.* Nce so guaie ?*Ro.* Guaie , guaie , ma co la pala :

Lo gnore vuosto è mmuò... muorto de simpeca.

Ni. Tata ?*Ro.* Tata mperzona.*Ni.* Io mo sconocchio.

La morte soia m' ha fatto

Tutto iocà ncopp' a na carta : chillo

Era lo spruocolillo

De sta misera vita : è mmuorto iusto

Ment' io l' aveva dato qua desgusto ?

Chest' è la pena mia , chisto zeffunno

De trommiente me manna a l' ato munno.

SCENA VEGESEMAPRIMMA

*D. Camilluccio , e Dditte.**Ca.* Coletta mia , tu chiagne ?*Ni.* Co lacreme de sango , co raggione ,

E co ttutto lo core.

È mmuorto tatagnore.

Ca. Oh me scasato !

Io co Don Nufrio zieto avea parlato

Pe prcarlo, e fà fà sto matremmonio :

E mmo me ne venea iappeca iappeca

A ghiettarme a li piede de Don Peppe.

Ni. Passaie lo tiempo, Camilluccio mio ,

Che Berta mia filava. È no demmonio

Chi mme nnommena schitto matremmonio.

Lo gnore mio, marisso ,

Ha lassato lo munno ? ed io cod isso.

Gnorsì, tata mio caro ,

S' io ve sapiette dà no muorzo amaro ,

Mo lo boglio scontà ntra quatto mura ;

Io ve vaso le mmano , e mecco nterra

Pe rispetto la faccia...

Pe. Viene ccà, figlia mia, viene, e m'abbraccia.

Ni. È ssuonno, o visione ?

Ro. Io mo me ioco puro

Novanta la Fortuna, e ffaccio n' ambo ,

Pe. Non è ssuonno, Colè, nè bisione.

So bivo, ed aggio ntiso

Tutto chello ch' aie ditto ,

E nzin' a l' angonia

Dint' a sto core lo tterraggio scritto.

SCENA VEGESIMASECONNA.

D. Nufrio, e Dditte.

Ni. Me sento n'at' e ttanto. Gnore mio,
 Co le ddenocchia nterra
 Io ve cerco na razia. Pocca vuie
 Site vivo, aggio a rire, e non a cchiagnere.
 Si non bolite darne Camilluccio,
 Non horria nesciun' autro:
 A lo mmacaro non m'affriggo l'arma,
 E mm'atterro contenta co la parma.
Ca. Pur' io me ietto ccà de facce nterra,
 E allucco: razia razia!

Nu. Peppe mio
 Si vuoie fà lo ncocciuso nsempetierno,
 Non sì de ccarne cchiù, sì de pepierno.

Ro. Che ve costa lo ddì: ve sia conciesso?

Pe. Si miedeco te faie, Monzù mio caro,
 Io figliama tte dò.

Ca. Miedeco schitto?
 Me farraggio geruggeco, speziale,
 Servezialista, schiattamuorto, e ppuro
 Pezzente co cchill' abbeto torchino,
 Pe ssentì li guagliune ntutte l'ore:
 Lo priore mo passa, lo priore.

Nu. Che penzata aggio fatta !

Peppe mio , si porzì tu te faie miedeco ,
Tiene a cchillo servizio tutte quante ,
E tte mmiedeche tu da mo nnenante.

Ro. Gnorsì , chest' è la via

De stà subbeto buono ; pocca credo
Che so le mmalatie
Respettose co tutte li dotture ,
E li stimmano comm' a protetture.

Pe. Nufrio mio, tu coffie : non è cchiù tiempo
De leiere Galeno , e Boveravo.

Nu. Comme ? nec stanno cierte che no ssanno
De quanta mise è l' anno.

Pe. Ma bbesogna parlà spisso nlatino ,
Cchiammà le mmalatie co nomme griee ,
Scrivere le ricette...

Nu. Appena tiene

Chella velata de dottore ncuollo ,
E cchillo barrettino arrecamato ,
Vene la scienza nfosa ,
E ssaie cchiù de na cosa.

Pe. E cchill' abbeto donca nfonne tutto ?

Nu. Nfonne a tte , ma fa i nfunno de mare
Li povere malate.

Ro. Vasta schitto

Lo bastone , pe ffarve miezo miedeco ,

Ha da esse mperò de canna-d'-innia.

Ca. Io pe mme già so miedeco , e ggeruggeco.

Nu. Si t' addotture mo , fratiè , faie meglio.

Pe. Comme mo?

Nu. Mo , ccà dintò.

Pe. Int'a sta casa ?

Nu. A lo palazzo a sto pontone vene

Na mmorra de dotture ammice mieie

Iuorno pe ghiuorno : io vaco

Mo a cchiammarle , e cco mmico te le porto :

Quanto schitto le daie quatt' aranciate.

Pe. E a cchello , ch' addimmannano

Io responno a barrate de cecate?

Nu. Te lo scriveno mprimmo ndoie parole.

Mittete ntanto la perucca ionna ,

E la sciammeria a mmanecche abbottate.

Pe. Quanta ne voglio avè cetrangolate !

D. Nufrio, Nicoletta, Camilluccio, e Rosella.

Ca. Zi-zio futuro mio, vuie che ntennite
De ffà co cchisse miedece apposticce?

Ro. La storia a cche fenesce no lo ssaccio.

Nu. A spassarce no poco.

Li cuommece de chella compagnia
Detta Lommarda-veneta hanno fatta
Na scena, addò no miedeco addottorano.
Io ne tengo na copia : mo trovammo
Quatto ammice che fengeno li miedece,
E fratemo farrà lo baccelliero.
Nuie sentimmo annascuse.

Ni. Ma me pare ,
Zi Nufrio mio , che se coffea gnopatre.

Nu. Non è pe ccoffeiarlo , ma sse ccarole ,
E sso verme da capo pe llevarle.
La scena è ntra de nuie ,
Poch' ammice, e ppariente: e Carnevale
Permette sse pazzie. Va, preparammo
La gallaria.

Ca. Colè, che tte ne pare?

Ni. Accossì vo Zi Nufrio ; aggio a ccagliare.

SCENA URTEMA VERA

Liservezialiste, che fanno da mazziere, traseno li primme. Appriess' a lloro veneno a ccocchia a ccocchia li speziale co li lammicche: doppo comparescono li geruggeche, e li miedece, e s' assettano, cchille a mmano manca, e cchiste a mmano deritta. Lo presidente s' assetta a no seggione mmiezo a la gallaria: e Don Peppe che sta p' addottorarse, se mette ncoppa a no scannetiello rimpetto a lo presidente.

*Pre. Sapientissimi doctores,
 Medicinae professores,
 Che assettate state ccà;
 E buie ate, mieie signure
 Speziale, e nzagnature;
 Salus, onor, et pecunia,
 Facce tosta cchiù d' ancunia,
 E appetito nquantetà.
 Ego debeo confiteri,
 Atque dicere, et sateri,
 Ca sta bella professione
 È na bona mmenzione
 Pe nce fare grellià.*

Medicina, ars incantata,
Ars argentea, et inaurata,
 Che le cchiacchiere sa vennere,
 E ppapocchie dà a rrentennere
 Pe specchiate veretà.

Tota terra nos honorat,
Sine nobis moesta plorat:
 E ntramente oh quante e quante
 A li nuove camposante
 Vanno mpace a requià!

Ergo est nostrae sapientiae
Boni sensus, et prudentiae,
 Nchisto credde to restare,
 Chesta strata non lassare,
 Nè fenì pe nce scacà:
 E arrollà sempe perzone,
 Che sta ricca professione
 Fanno mpoppa velià:

Nunc vos estis convocati,
Docti amici laureati,
 Pe bedè sì sso signore
 Pò trasire pe dottore;
 E l'avite a scrutenà.

Dot. I. Cum permissu, cum licentia
 De sta bella, e addotta audienza,
Ego quero

A sto nuovo baccelliero ,
 Pecchè l' oppio puro n' uorco
 Comm'a ppuorco fa dormì.

*Pe. Quia in eo est semper viva
 Magna virtus dormitiva ,
 E fra Paolo fa venì.*

*Coro. A cciammiello nce ha respuosto !
 E ntra nuie no bello puosto
 Hic est dignus de piglià.*

*Dot. 2. Et in illo maledicto
 Fero morbo , Hidrops dicto ,
 Qua remmedie s'hann'a ddà ?*

*Pe. Missio sanguinis , cauterium ,
 Caballinum et clysterium ,
 E ppurgante nquantetà.*

*Coro. A cciammiello nce ha respuosto !
 E ntra nuie no bello puosto
 Hic est dignus de piglià.*

*Dot. 3. Tibi peto , amice mi :
 A cchi sta pe gnettechì
 Che se dà pe lo sarvà ?*

*Pe. Missio sanguinis cauterium ,
 Caballinum et clysterium ,
 E ppurgante nquantetà.*

*Coro. A cciammiello nce ha respuostò !
 E ntra nuie no bello puosto
 Hic est dignus de piglià.*

Dot. 4. Facio tibi quaestionem :

Si uno tene *indigestionem*,

Lo remmedio qua sarrà?

Pe. Missio sanguinis, cauterium,

Caballinum et clisterium,

E ppurgante nquantetà.

Dot. 5. Ma si chella ndigestione

Cchiù ssenti non bo raggione ;

Quid faciendum, quid agendum?

Ate bobbe ha da mmoccà.

Pe. Missiones multi sanguinis,

Quatuor, quinque, sex cauteria,

Elephantis et clysteria,

E ppurgante a ffà schiattà.

Coro. A cciammiello nce ha respuosto !

E ntra nuie no bello puosto

Hic est dignus de piglià.

Pre. Iuras semper custodire

Ogne regola, e statuto

Recevuto, sia presente

Sia pretereto, o futuro.

Pe. Iuro, iuro.

Pre. Iuras sempe a li consurte

De ì appriesso a li vecchiune,

Comm'appriess'a li montune

L'aine vanno p'avè ncanna

No sollenne scannaturo.

Pe. Iuro, iuro.

Pre. Iuras sempe mmedecare

Co le hobbe ccà approvate,

Sibbè avessero a crepare.

Tutte nfrotta li malate,

E ne fusse tu sicuro.

Pe. Iuro, iuro.

Pre. Ergo ego tibi dono

St'arbernuzzo fatt' e buono,

Ed acquiste la virtù

De potere a buonneccchiù

Mmedecare, macellare,

Stroppeiare, mpapocchiare

Sia pe tterra, sia pe mmare;

E maie lotane passare.

Coro. Novus doctor semper vivat,

Semper bibat, et manducet,

Semper vivos semper tuat,

Semper mortuos semper laniet;

Nfì che arriva a li cient'anne,

E mporchiato, chiatto, e ttunno

Cchiù non cape int' a li panne,

E ss'abbia pe l'ato munno.

SCOMPETURA.

HAG 2008317

ERRATA.

7	10	<i>Appriesso</i>	Appriesso
24	1	A mmorte	O a mmorte
30	5	assigga	asigga
30	8	consegnare	conzegnaire
35	15	no	non
44	20	la	lo
46	20	fare	fare)
56	11	Ne mme	No mme
70	13	<i>Mi</i>	<i>Ma</i>
70	21	<i>Mi</i>	<i>Ma</i>
72	17	<i>Br.</i>	<i>Ar.</i>



OPERE DEL BARONE ZEZZA.

Opere Poetiche in cinque volumi . . .	I 00
Dialoghi sul gusto del secolo	20
La Metamorfosi di Pulcinella	15
L'Arlecchineide	10
L'Effemeridi Febee.	15
La Lesina di Miserino Penuria	10
L'Anti-lesina di Generoso Generosi. . .	10
La Moda di Madama Vittoria	08
Il Codice della Seccatura.	10
Le Muse in tribunale.	15
Il Giornale d'un giorno	08
La Sferza di Pasquino, e le Cozzate di Marforio	12
Le Sventure in passatempi	08
La Ditta Poetica di Pelacane, Lavaciuco, e Compagno	10
La Smorfia	05
Il Parnaso in Locanda, ed in Teatro. .	10
Le Bontoniste Redicole	08
L'Accademia Cavaiola	10
La Vita Mmalorata de la Sia Stella . .	05
La Scigna, Rimme d'auture guappe . .	06
La Festa de lo Mercato	05
La Iettatura.	10
Lo Matremmonio a fforza	08
Lo Malato p'apprensione.	15
Metastasio a la Conciaria. ,	12



1911-1912



